

Caïti-Russo (con modifiche di Luca Gatti)

I.
Maintas vetz sui enqueritz
en cortz cossi vers no fatz;
perq?ieu vuoill sia apellatz,
e sia lor lo chausitz,
chanssos o vers aquest chans;
e respon als demandans
c?om non troba ni sap devesio
mas cant lo nom entre vers e chanso.

II.
Q?ieu ai motz mascles auzitz
en chanssonetas assatz,
e motz femenis pausatz
en versetz bos e grazitz;
e cortz sonetz e trotans
ai auzitz en versetz mans,
et ai auzit chanssoneta ab lonc so,
e·ls motz d?amdos d?un gran e·l chan d?un to.

III.
E s?ieu en so desmentitz
c?aissi no sia vertatz,
non er hom per me blasmatz,
si per dreich m?o contraditz;
ans n?er sos sabers plus grans
entre·ls bos e·l mieus mermans,
si d?aisso·m pot vensser segon razo,
qu?eu non ai ges tot lo sen Salamo!

IV.
Car es de son loc issitz
Dompneis que ja fon prezat,
mi sui alques desviatz
d?amar, tant n?estau marritz
qu?entr?amairitz et amans
s?es mes us pales engans:
q?enganan cre l?us l?autre far son pro
e no·i gardon temps ni per que ni co.

V.

Q?ieu vi, anz que fos faiditz,
si·us fos per amor donatz
us cordos, q?a dreich Solatz
n?issi? Acortz e Covitz;
per qe·m par que dur dos tans
us mes non fazia us ans,
qan reignava Dompneis ses trahizo;
greu es qui ve cum es e sap cum fo.

VI.

Mas non es tant relenquitz,
si tot me sui desamatz,
q?ieu no sia enamoratz
de tal q?es cima e razitz
de Pretz tant c?a mi es dans,
puois la Valors e·l Semblans
son assemblat en tant bella faisso
c?om no·i pot plus penssar meilluraso.

VII.

Ai! Bels cors cars, gen noiritz,
adreit e gen faissonatz,
so q?ie·us vuoill dir devinatz,
q?ieu non sui ges tan arditz
q?ieu prec que m?ames; enans
vos clam merce mercejans:
sofretz qu?ie·us am e no·us qier autre don
e ja d?aquest no·m devetz dir de no.

VIII.

Vas Malespina ten, chans,
al pro Guillem q?es prezans:
q?el aprenda de te los motz e·l so,
qal qe·is vuoilla, per vers o per chansso.

IX.

Na Biatritz d?Est, l?enans
de vos mi platz, qe·is fai grans,
e a vos lauzar si son pres tuich li bo:
perq?ieu ab vos dauri mon vers-chansso.

- letto 282 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/ca%C3%AFti-russo-con-modifiche-di-luca-gatti>